



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKI NAČELNIK**

Broj: 02-49-2-1278/16

Datum: 23.05.2016. godine

**OPĆINSKO VIJEĆE  
T E Š A N J**

**PREDMET:** Informacija o radu javnih preduzeća kojima je osnivač  
općina Tešanj za 2015. godinu,-

Godišnji izvještaj o poslovanju javnih preduzeća Općine Tešanj, kao obavezu proisteklu iz člana 6. Zakona o javnim preduzećima da Skupština javnog preduzeća podnosi Općinskom vijeću izvještaj o radu i poslovanju, obuhvata:

- Odluku Skupštine dioničara o usvajanju izvještaja o poslovanju;
- Odluku Nadzornog odbora o usvajanju izvještaja o poslovanju;
- Izvještaj o poslovanju preduzeća, pripremljen u skladu sa utvrđenom formom i propisanim elementima koje izvještaj treba da sadrži;
- Izvještaj o radu Nadzornog odbora;
- Izvještaj revizije i
- Finansijski izvještaj.

U cilju efikasnijeg rada Vijeća, Predsjednicima klubova političkih partija dostavljeni su kompletni izvještaji javnih preduzeća, a Informacija o poslovanju javnih preduzeća Općine Tešanj za 2015. godinu predstavlja kratak presjek najznačajnijih aktivnosti preduzeća u protekloj godini, daje pregled osnovnih finansijskih pokazatelja poslovanja na osnovu izvještaja o poslovanju za 2015. godinu te oslikava ciljeve i rezultate kao i mjere poduzimane radi ostvarenja ciljeva.

Općina Tešanj, odnosno Općinsko vijeće Tešanj osnivač je tri javna preduzeća:

1. JP „RAD“ d.d.
2. JP TOPLANA d.d.
3. Agencija za razvoj općine Tešanj „TRA“ d.o.o.

**JP „RAD“ d.d.**

U skladu sa zaključcima Općinskog vijeća Tešanj, poslovna aktivnost JP „RAD“ d.d. Tešanj, trebala je biti usmjerena na:

- realizovati zaključak Vijeća iz 2014. godine (povećanje kapitala za predane objekte Rad-u),
- snimiti godišnji obim otpada na području općine Tešanj, utvrditi % otpada koji se zbrine na deponiji i povećati broj korisnika za 5 %.

Smjernice i zaključci Općinskog vijeća u okviru kojih je trebalo da se odvija poslovanje JP „RAD“ d.d. Tešanj trebalo je ostvariti realizacijom slijedećih kratkoročnih ciljeva:

- kvalitetnim i kontinuiranim vodosnadbijevanjem, dispozicijom otpadnih voda, održavanjem komunalne higijene urbanih sredina i zbrinjavanjem komunalnog otpada doprinijeti razvoju i održavanju ekološke sredine, te podizanju kvaliteta života stanovništva,
- kontinuirano širenje obuhvata područja i broja korisnika komunalnih usluga, a samim time i obezbjeđenje rasta prihoda,
- instalacija i primjena GIS-a (geografskog informacionog sistema),
- dogradnja telemetrijskog upravljanja sistemom vodosnadbijevanja,
- kontinuirana dogradnja MIS-a (menadžment informacionog sistema),



- daljnje širenje reciklažnih otoka, izgradnja neophodne infrastrukture za selekciju i presovanje iskoristivog otpada,
- realizacija planiranih kapitalnih projekata shodno priloženom pregledu.

Prikupljanjem i deponovanjem komunalnog otpada obuhvaćeno je 6.045 korisnika, i za 268 korisnika je više nego u 2014. godini što je povećanje od 4,3% novih korisnika.

U realizaciji zaključka Općinskog vijeća o povećanju kapitala društva objektima koji su predani na upravljanje preduzeću, JP "RAD" se prethodno upoznao sa proceduralnim pitanjima Komisije za vrijednosne papire vezanim za realizaciju ovog zaključka obzirom na kompleksnost materije i modele. Zaključak je još uvijek u fazi realizacije.

U oblasti vodosnadbijevanja JP "RAD" je pružalo usluge za 6.961 korisnika (117 korisnika više nego 2014. godine). Tokom 2015. godine zabilježena je povećana potrošnja i kontinuitet u vodosnadbijevanju.

U distribuciji otpadnih voda tokom 2015. godine zabilježeno je povećanje od 56 novih priključaka na kanalizacionu mrežu, odnosno 2,01% više nego prethodne godine. Broj korisnika kanalizacionog sistema značajno će se povećati nakon što se okonča projekt koji vodi Općina Tešanj na izgradnji sistema za prikupljanje otpadnih voda sa područja Općine. Predstavnici preduzeća uključeni su u realizaciju ovog projekta.

U toku 2015. godine gubitak vode u vodovodnom sistemu Tešanj-Jelah iznosio je 28,97%, dok je na vodovodu Kraševo iznosio 12,95% pa se za općinski vodovodni sistem u cjelini može reći da gubitci iznose 27,56%. Obzirom na starost vodovodne mreže održavanje gubitaka u sistemu ispod 30% je na granici pozitivnog odnosa ulaganja i efekata koji se postižu smanjenjem gubitaka. Smanjenje gubitaka u narednim godinama djelimično će biti ostvareno i rekonstrukcijom i sanacijom vodovodne mreže na pojedinim dionicama (u ul. Huseinkapetan Gradašćevića-Jelah, Piljužići-vodovod Pousorje, cjevovod u zoni rezervoara Krndija).

Uz Izvještaj o poslovanju preduzeća dostavljen i Prijedlog rebalansa plana kapitalnih ulaganja za 2016. i 2017. godinu. Općina Tešanj planira izgradnju primarnog kolektora kanalizacione mreže na potezu Mračaj-Ljetinić pa je zbog preklapanja trase vodovoda i kanalizacije, na većem dijelu dionice, planirana koordinirana aktivnost na potezu Jelah-Industrijska zona Glinište. U cilju obezbjeđenja dodatnih količina vode dogovorena je izgradnja probno eksploatacionog bunara u vrijednosti 265.000 KM (općina 100.000, ostalo preduzeće) te nabavka vozila za čišćenje ulica, četke i freze za snijeg.

U okviru sistema ISO 9001:2008 redovno jednom godišnje provodi se anketiranje zadovoljstva kupaca. Prosječna ocjena zadovoljstva korisnika u 2015. godini je 4,43 a u 2014. godini je 4,36. U okviru upitnika korisnici usluga imaju mogućnost da daju primjedbe i sugestije koje se analiziraju i poduzimaju mjere za povećanje zadovoljstva korisnika. Rezultati ankete se objavljuju na web stranici preduzeća.

U toku 2015. godine JP "RAD" d.d. Tešanj sa 85 uposlenika (4% više nego 2014. godine) ostvarilo je ukupne prihode u iznosu od 3.680.943 KM ili 14,5 % više nego prošle godine i ukupne rashode u iznosu od 3.214.213 KM.

Struktura poslovnih prihoda je slijedeća:

- prihodi od vode čine 34,5 % ukupnih prihoda i veći su za 10,9 % u odnosu na prošlogodišnje;
- prihodi od zbrinjavanja otpada čine 27,3 % i veći su 1,6 %;
- prihodi od distribucije otpadnih voda čine 7,5 % ukupnih prihoda i veći su za 13,7 % u odnosu na prethodnu godinu, i drugi prihodi 30,7%.

Struktura poslovnih rashoda je slijedeća:

- amortizacija čini 19,3% i veća je za 78,5 %;



-troškovi plaća i ostalih ličnih primanja čine 52,9 % ukupnih rashoda, i drugi rashodi 27,8%.

U posmatranom izvještajnom periodu ostvarena je neto dobit preduzeća u iznosu od 53.291 KM. Zaposlenim je isplaćena prosječna plata u iznosu od 853 KM. Prosječna ukupna mjesečna primanja po radniku iznose 1.248 KM. Posljednja najveća plata isplaćena je u iznosu od 2.304 KM a najmanja u iznosu od 436 KM.

Komunalno preduzeće Rad kao korisnik bunara u Jelah polju, trenutno je u sudskom sporu sa općinom Usora, koja smatra da zbog toga što se bunari teritorijalno nalaze u granicama njene općine ima pravo na vlasništvo i upravljanje nad bunarima. Formiran je pravni tim, koji je pripremio tužbe i spor je trenutno u sudskom rješavanju.

U toku 2015. godine Nadzorni odbor preduzeća održao je ukupno 9 sjednica, na kojima su razmatrana pitanja iz nadležnosti Nadzornog odbora. O svom radu Nadzorni odbor redovno izvještava Općinskog načelnika i resornu Službu dostavom zapisnika o održanim sjednicama. Nadzorni odbor je mišljenja da je Izvještaj o poslovanju preduzeća za 2015. godinu realan te da je na analitičan način pokazao poslovanje preduzeća. Sjednice su održavane prema potrebi a najmanje jednom u tri mjeseca.

### **Zaključci i smjernice Općinskog vijeća Tešanj za JP „RAD“ u 2016. godini**

1. Realizirati zaključak Vijeća iz 2014. godine (povećanje kapitala za objekte koji su predati Rad-u na upravljanje).
2. Komunalno preduzeće će preuzeti realizaciju projekta gradnje novih bunara (značajnim finansijskim učešćem), u cilju povećanja količina pitke vode
3. Intenzivirati aktivnosti na proširenju obuhvata i povećanju broja korisnika sistema prikupljanja i odvoza otpada

### **JP „TOPLANA“ d.d.**

U skladu sa zaključcima Općinskog vijeća Tešanj, poslovna aktivnost JP “TOPLANA” d.d. Tešanj, trebala je biti usmjerena na:

- sanaciju deponije šljake kao uslov produženje/dobijanja okolinske dozvole za rad “Toplana”,
- povećati stepen naplate na godišnjem nivou za 5 %,
- realizirati zaključak Općinskog vijeća iz 2014. godine (povrat starih korisnika), kao i proširenje mreže na nove korisnike.

Smjernice i zaključci Općinskog vijeća u okviru kojih je trebalo da se odvija poslovanje Toplane, trebalo je da se realizira kroz sljedeća područja rada:

- a) sanaciju deponije šljake,
- b) sačiniti projektnu dokumentaciju za toplifikaciju za naselje Tepe,
- c) zadržati postojeće kupce toplotne energije,
- d) priključenje JP “Rad” d.d. Tešanj na jedinstven sistem grijanja grada Tešnja,
- e) realizovati definirane ciljeve kvaliteta i okolinske operativne ciljeve za 2015. godinu,
- f) pružiti maksimalnu podršku projektu GOLD u implementaciji istog na području Općine,
- g) u saradnji sa osnivačem i većinskim vlasnikom Općinom Tešanj, raditi na implementaciji Zakona o komunalnim djelatnostima, te na izradi podzakonskih akata koje treba donijeti Općinsko vijeće, kao i Odluke o novom tarifnom modelu.

U toku 2015. godine “Toplana” je svoju osnovnu funkciju, proizvodnju i distribuciju toplotne energije obavljala sa 22 zaposlena radnika koliko je imala i u prethodnoj godini. Ukupan broj korisnika usluga i grijana površina je nepromijenjena u odnosu na prethodni izvještajni period. JP “Toplana” d.d. Tešanj ima ukupno 644 korisnika usluga (72 privredna objekta i 572 fizička lica i



institucije), a ukupno grijana površina iznosi cca 72.955 m<sup>2</sup> koji u strukturi čini 30.957 m<sup>2</sup> stambenog prostora, 29.150 m<sup>2</sup> poslovnog i 11.190 m<sup>2</sup> proizvodnog prostora. Na osnovu iznesenih podataka može se konstatovati da je preduzeće realiziralo operativni cilj zadržavanja postojećih kupaca, ali nije realiziralo zaključak Općinskog vijeća koji se aktuelan već dvije godine, vraćanje starih korisnika na sistem grijanja.

U ostvarivanju ovog cilja tokom 2015. godine u preduzeću su aktivno bili uključeni u razgovore sa Mann+Hummel-om (obavljena dva kruga razgovora, dostavljena inicijalna ponuda, izvršen probni rad grijanja prostora tvornice-konačna ponuda i potvrda ugovora očekuje se u toku 2016. godine).

Postavljeni cilj o sanaciji deponije šljake kao jedan od preduslova za produženje okolinske dozvole, realiziran je polovično. Sanacija deponije je planirana da se realizuje fazno, u toku 2015. godine pripremljena je revizija projekta sanacije deponije te urađeno novo-fazno projektno rješenje realizacije projekta čija prva faza počinje sa realizacijom u prvom polugodištu tekuće godine.

Izrada projektne dokumentacije za toplifikaciju naselja Tepe nije realizirana. Uz saglasnost Nadzornog odbora prolongirana je izrada projektne dokumentacije zbog mogućnosti rješenja toplifikacije ovog naselja kroz budući projekt toplifikacije Općine.

Naime, Općina Tešanj je finansirala izradu Idejnog projekta toplifikacije općine Tešanj obnovljivim/ekološki prihvatljivim izvorima energije u okviru projekta "Toplifikacija Pousorja (općine Tešanj, Usora i Doboj Jug)", projekt završen. U budžetu kantona planirana su sredstva za izradu Studije opravdanosti javno privatnog partnerstva za toplifikaciju Pousorja (općine Tešanj, Usora i Doboj Jug) izvorima obnovljive energije, kao drugi korak u ostvarivanju višemilionskog projekta u okviru javno privatnog partnerstva.

Jedan od zacrtanih ciljeva za 2014. godinu odnosio se na poboljšanje naplate potraživanja i to na nivou većem ili jednakom 70% dospjelih a nenaplaćenih potraživanja. Cilj je u cjelosti realiziran, procenat naplate iznosi 81%.

Priključenje JP "Rad" d.d. Tešanj na jedinstven sistem grijanja grada Tešnja, djelimično je realiziran. Zahtjev za priključenje od strane JP "Rad" je podnesen, "Toplana" d.d. je sačinila projekat priključenja JP "Rad" na jedinstveni sistem grijanja, izdala energetska saglasnost, izgrađen je priključni vrelovod. Razlozi zašto JP "Rad" prolongira priključenje na jedinstveni sistem grijanja nisu u više u nadležnosti "Toplana" d.d. Tešanj.

U cilju realizacije definiranih ciljeva kvaliteta i u cilju provedbe obaveza vaezanih za Okolinsku dozvolu i standard ISO 14001, u toku 2015. godine vršen je redovan monitoring kvaliteta zraka, te sastav dimnih plinova na dimnjaku. U cilju smanjenja emisije dimnih plinova i poboljšanja procesa sagorijevanja uglja isprobano je uvođenje odgovarajućih aditiva-katalizatora.

U toku 2015. godine predstavnici "Toplana" d.d. bili su aktivno uključeni u realizaciju projekta Toplifikacije Općine Tešanj obnovljivim izvorima energije u sklopu regionalnog projekta "Toplifikacija Pousorja-Općine Tešanj, Usora i Doboj-Jug izvorima obnovljive energije". Uz Općinu Tešanj na projektu su angažovani partneri: USAID/Sida Gold Projekt, Toplana, TRA-Agencija za razvoj općine Tešanj, Ministarstvo za privredu ZE-DO kantona. Idejni projekt toplifikacije općine Tešanj obnovljivim/ekološki prihvatljivim izvorima energije, je završen i bio je preduslova za izradu Studije opravdanosti toplifikacije Pousorja - Općine Tešanj, Usora i Doboj-Jug koja je planirana u budžetu ZE-DO kantona.

U toku 2015. godine „Toplana“ je ostvarila ukupne prihode u iznosu od 1.703.809 KM što je 3% više nego u 2014. godini, uz ostvarene rashode od 1.678.673 KM ili 3% više nego u prethodnoj godini. Neto dobit u 2015. godini ostvarena je u iznosu od 32.375 KM. Broj zaposlenih je



nepromijenjen - 22 uposlenika koja su u izvještajnom periodu ostvarila posljednju isplaćenu minimalna plata u iznosu od 505 KM te posljednju maksimalnu plata u iznosu od 2.320 KM a sve na prošlogodišnjem nivou. Prosječna ukupna primanja po radniku ostvarena su u iznosu od 1.270 KM i manja su za 1 % u odnosu na prethodni izvještajni period.

Izvještajem nezavisnog revizora o provedenoj reviziji finansijskih izvještaja za obračunski period 01.01. do 31.12.2014. godine konstatovano je da kod potencijalnih obaveza i rezervisanja treba voditi računa da treba rezervisati sredstva jer preduzeće još uvijek ima aktuelan jedan spor koji se vodi sa bivšim direktorom društva ("Toplana" osporava dio presude koji se odnosi na dio doprinosa za period u kome je bivši direktor bio angažovan kao uposlenik srednje škole). Društvo je u 2015. godini izvršilo korekciju finansijskih izvještaja za prethodni period u skladu s Izvještajem nezavisnog revizora.

"Toplana" ima 85.545 KM potraživanja starijih od godinu dana. Najznačajniji dio ovih potraživanja odnosi se na "Pobjeda" d.d. Tešanj u iznosu od 65.225 KM za koja je zaključen sporazum o otplati duga, a za preostali dio potraživanja izvršeno utuženje.

JP "Toplana" anketu zadovoljstva korisnika usluga provodi u skladu sa standardima ISO sertifikata, jednom godišnje. Nakon provedene ankete dobijeni upitnici se analiziraju, te se po potrebi poduzimaju mjere koje su propisane standardima.

Nadzorni odbor JP „Toplana“ u 2015. godini održao je 10 redovnih sjednica i na taj način vršio kontinuiran nadzor nad radom i poslovanjem društva i Uprave, uz redovno izvještavanje Općine. Izvještaj o poslovanju za proteklu godinu je usvojen uz konstataciju da je vrlo bitno da su stvoreni uvjeti za proširenje broja korisnika kao i za priključenje ranijih korisnika koji su se isključili sa mreže na njihov zahtjev. Plan je da se nastavi sa započetim aktivnostima kao i da se kontinuirano radi na unapređenju poslovanja u svim segmentima koristeći savremene tehnike marketinga.

### **Zaključci i smjernice Općinskog vijeća Tešanj za JP „TOPLANA“ u 2016. godini**

1. Nastaviti sa realizacijom I faze sanacije deponije šljake kao uslov produženja/dobijanja okolinske dozvole za rad "Toplana",
2. Kao trajan proces zadržati dostignuti stepen naplate (81%) uz ulaganje dodatnih napora na povećanju procenta naplate potraživanja,
3. Toplana Tešanj će nastaviti sa aktivnostima na obezbjeđenju projektne dokumentacije za širenje obuhvata Toplifikacije i nove investicije u povećanje efikasnosti sistema

### **Agencija za razvoj općine Tešanj „TRA“ d.o.o.**

U skladu sa zaključcima Općinskog vijeća Tešanj, poslovna aktivnost Agencije za razvoj Općine Tešanj "TRA" d.o.o., trebala je biti usmjerena na:

- aktivnosti pripreme i implementacije projekata i projektnih aplikacija za potrebe realizacije strateških opredjeljenja Općine, javnih preduzeća i javnih ustanova kao trajnom cilju koji predstavlja jednu od osnovnih djelatnosti Agencije,
- uspostavu operativnog ureda za rad sa investitorima i poslovnom zajednicom, te
- usklađivanje konta razgraničenja sa troškovima amortizacije kako bi se riješio problem evidentiranog gubitka u poslovanju.

Smjernice i zaključci Općinskog vijeća u okviru kojih je trebalo da se odvija poslovanje Agencije, trebalo je da se realizira kroz slijedeća područja rada:

- a) projektni menadžment,
- b) baze podataka, analize, statistika, studije,



- c) promocija ekonomskih potencijala, teritorijalnog marketinga, podrška izvozu i investicijama,
- d) javno-privatni dijalog,
- e) obuka radne snage,
- f) ruralni razvoj,
- g) energetska efikasnost,
- h) zaštita okoliša.

Realizaciju planiranih aktivnosti tokom 2015. godine "TRA" je realizirala na slijedeći način:

U okviru aktivnosti projektnog menadžmenta pripremljeno je i aplicirano sa ukupno 12 projektnih aplikacija, od čega su 4 odobrene i u toku 2015. godine su tri projekta implementirana. Tri projektna prijedloga su odbijena, 4 projektna prijedloga se nalaze u fazi odlučivanja (za 2 prijedloga postoje naznake da će biti odobreni) a 1 projektni prijedlog treba doraditi za dalje kandidovanje.

U fazi realizacije su dva velika projekta "COBEAR" i "Podizanje nasada maline".

Projekt COBEAR je odobren 2014. godine i implementira se u partnerstvu sa općinama Teslić i Žepče te sa Udruženjem privrednika "Biznis-centar" Jelah-Tešanj u ukupnom iznosu od 526.575,65 eura i u trajanju od 30 mjeseci. U okviru projekta je izvršena adaptacija OSS kancelarije u sve tri općine te izvršeno opremanje OSS ureda. Za potrebe općine Tešanj urađena je Cost Benefit analiza za poslovnu zonu Glinište. Za potrebe određenog broja privrednih subjekata iz BEAR područja urađene su analize stanja i potreba, izrada marketing i biznis planova, izvršena obuka OSS službenika, prema instrukcijama donatora vođene aktivnosti na promociji projekata itd.

Podizanje nasada maline je projekt vrijedan 280.872,85 KM. Tokom 2015. godine izvršeno je podizanje nasada kod 50 korisnika (planirano 37 a broj podignutih nasada veći je za 35 % od planiranog), angažovan agronom, nabavljena adekvatna oprema i vozilo za praćenje realizacije projekta, te izrađena brošura. Fokus projekta je na nezaposlenim osobama ili onim sa niskim primanjima, pripadnicima boračke populcije i sličnim kategorijama stanovništva.

U okviru pripreme baza podataka, analiza, statistike i studija, uspostavljene su baze podataka za privredna društva sa svim ekonomskim pokazateljima poslovanja, baze podataka za radnu snagu, izvoz i investicije, urađena analiza potreba rdne snage sa obukom.

Promocija ekonomskih potencijala Općine Tešanj, teritorijalnog marketinga, podrška izvozu i investicijama, ogleda se kroz uspostavljen OSS URED-COBITES, izrađen Informator za investitore na bosanskom i engleskom jeziku, urađeni letci i promotivni materijal (za Centar za obrazovanje odraslih, letci o poslovnom okruženju Tešanj, brošura za sortimente jagodičastog voća), izrađena Analiza 4 industrijska sektora u BEAR području i akcioni planovi za 33 firme sa preporukama, urađeni auditi i date preporuke za 6 firmi iz Tešnja u oblasti izvoza itd.

Javno-privatni dijalog realizirao se u saradnji sa Općinom kroz realizaciju, usvajanje radnog uputstva za rad sa investitorima i poslovnom zajednicom. Tokom godine pružana je tehnička podrška Savjetu za lokalni ekonomski razvoj općine Tešanj/SLER. Održane su dvije sjdnice SLER-a na kojima je od strane poslovne zajednice i drugih učesnika u radu podnešeno 18 inicijativa/rješeno njih 10, 1 inicijativa odbijen a ostale su u fazi realizacije.

Aktivnost na obuci radne snage, kao unapređenje znanja i vještina radne snage koja može odgovoriti izazovima i potrebama koje se nameću od strane privrednih subjekata, realizirana je kroz dva programa obuke: 30 kandidata za CNC operatere uz podršku Federalnog ministarstva za razvoj, poduzetništvo i obrt i GIZ-a. Od obučanih kandidata njih 20 ima rješen radno-pravni status. Kao podrška budućim kandidatima za CNC operatere propremljen je i publikovan priručnik.



U pripremi projektnih prijedloga 2 projekta su iz oblasti poljoprivrede i nalaze se pred odobrenjem od strane donatora. Projekt unapređenje otkupa mlijeka na području općine Tešanj obuhvata nabavku uređaja za mjerenje bakterija i somatskih čelija u mlijeku, nabavku 20 muzilica za novemanje proizvođače te unapređenje znanja i vještina.

U oblasti energetske efikasnosti realiziran je projekt organizacije Habitat. "Energetski utopljena" zgrada/objekat kolektivnog stanovanja u ul. Trg Alije Izetbegovića, kao prvi takav objekt iz navedenog projekta u BiH, i uspostavljen sistem monitoringa projekta.

U oblasti zaštite okoliša, "TRA" aktivno je uključena u realizaciju projekta "Prikupljanje, odvodnja i prečišćavanje otpadnih voda na području općine Tešanj".

U skladu sa zaključcima Općinskog vijeća, jedan od aktivnosti Agencije trebala je u toku 2015. godine biti usklađivanje konta razgraničenja sa troškovima amortizacije kako bi se riješio problem evidentiranog gubitka u poslovanju. Gubitak nastao kao posljedica obračuna amortizacije po osnovu opreme iz ranijih perioda. U toku 2015. godine Nadzorni odbor donio je odluku kojom je određeno da se gubitak 2014. godine pokrije iz neraspoređene dobiti ranijih godina.

U toku 2015. godine Agencija je ostvarila ukupne prihode u iznosu od 426.237 KM koji su veći za 53,42 % u odnosu na prethodnu godinu. Prihod čine: dotacija Općine Tešanj u iznosu 78.075 KM i ostali prihodi 348.162 KM. Ovdje svakako treba primijetiti da se omjer dotacije iz budžeta Općine Tešanj smanjio te da je Agencija povećala ostvarene prihode po osnovu kandidovanih projekata (Centar za obrazovanje, projekt maline, projekt GIZ, projekt COBEAR i drugo), što je između ostalog bio i jedan od ciljeva u radu Agencije. U posljednjih nekoliko godina dotacije budžeta Općine bile su osnov za funkcionisanje i poslovanje Agencije. Prihod ostvaren u protekloj godini stvara dobru osnovu za finansijsku samostalnost Agencije. Kao rezultat ostvarenih prihoda i rashoda društvo je ostvarilo pozitivan finansijski rezultat-dobit u iznosu od 2.635 KM. Na kraju izvještajnog perioda Agencija je zapošljavala 5 radnika. Prosječna neto plata zaposlenih iznosila je 1.162 KM, posljednja minimalna plata isplaćena je u iznosu od 945 KM a maksimalna u iznosu od 2.304 KM.

Nadzorni odbor Agencije održao je 5 sjednica, uz redovno izvještavanje Općine. Na kraju izvještajnog perioda Nadzorni odbor konstatuje da su postavljeni ciljevi u Agenciji realizirani te da je prosječan stepen ispunjenosti ciljeva značajno prebačen. Zaključeno je da Agencija treba da postane prepoznatljiva po inovativnosti i podršci privredi, da nastavi saradnju sa Udruženjem-Udrugom privrednika "Biznis-centar" Jelah, Tešanj, da razvija i koordinira potrebe privrede i općine Tešanj sagledavajući resurse Općine.


### **Zaključci i smjernice Općinskog vijeća Tešanj za „TRA“ u 2016. godini**

1. Agencija će nastaviti redovne aktivnosti pripreme i implementacije primarno projekata za potrebe realizacije strateških ciljeva Općine Tešanj, javnih preduzeća i javnih ustanova,
2. Obezbjediti veću transparentnost i stabilnost u provođenju postojećih projekata, kako bi se ostvarilo puno povjerenje donatora i partnera i novi projekti
3. OSS ured za rad sa investitorima i poslovnom zajednicom će konstantno unapređivati svoj rad te postati Savjetovalište za privrednike i servis "Sve na jednom mjestu",
4. Intenzivirati aktivnosti na obezbjeđenju dalje finansijske samostalnosti u radu Agencije (dalje smanjenje učešća općine u finansiranju rada).

**OBRADIVAČ**

Služba za finansije, privredu, komunalne i inspeksijske poslove

Hamzaliya Hojkurić, dipl.ecc



**OPĆINSKI NAČELNIK**

Mr. sc. Suad Huskić,

